

0.0.1 dutiya chiggalasuttam

1. seyyathāpi bhikkhave, ayaṃ mahāpaṭhavī ekodikā assa. tatra puriso ekacchiggalam yugam pakkhipeyya. tamenam puratthimo vāto pacchimena saṃhareyya, pacchimo vāto puratthimena saṃhareyya, uttaro vāto dakkhiṇena saṃhareyya, dakkhiṇo vāto uttarena saṃhareyya, tatrassa kāṇo kacchapo. so vassasatassa vassasatassa accayena sakim sakim ummuḍḍeyya. taṃ kim maññatha bhikkhave, api nu so kāṇo kacchapo vassasatassa vassasatassa accayena sakim sakim ummuḍḍanto amusmiṃ ekacchiggale yūge gīvaṃ paveseyyāti? adhiccamidaṃ bhante, yaṃ so kāṇo kacchapo vassasatassa vassasatassa accayena sakim sakim ummuḍḍanto amusmiṃ ekacchiggale yuge gīvaṃ paveseyyāti.

2. evaṃ adhiccamidaṃ bhikkhave, yaṃ manussattam labhati, evaṃ adhiccamidaṃ bhikkhave, yaṃ tathāgato loke uppajjati araham sammāsambuddho, evaṃ adhiccamidaṃ bhikkhave, yaṃ tathāgatappavedito dhammavinayo loke dippati. tassidaṃ bhikkhave, manussattam laddham, tathāgato ca loke uppanno araham sammāsambuddho, tathāgatappavedito ca dhammavinayo loke dippati.

3. tasmātiha bhikkhave, "idaṃ dukkha"nti yogo karaṇīyo "ayaṃ dukkhasamudayoti" yogo karaṇīyo "ayaṃ dukkhanirodhoti" yogo karaṇīyo "ayaṃ dukkhanirodha-

gāminī paṭipadā"ti yogo karaṇīyoti.